

Charta digitala era per il Grischun

La «Swiss Map 25» facilitescha la planisaziun da turas

■ (anr/vi) Prest datti las chartas 1:25 000 da l'entira Svizra sin DVD. I manca be pli la varianta digitala dal Grischun. Lezza cumpara il november.

Tgi che va savens per la pizza, saja quai cun cun skis u a pe, enconuscha las chartas brinas da l'Uffizi federal da topografia. Las chartas dad 1:25 000 cuntegnan ina massa datas. Mintga chamona e mintga fecler è nudà.

Dal Grischun datti 47 chartas. Sch'insatgi vul cumprar las chartas da l'entira Svizra, sto el avair avunda plaz sin la curuna da cudeschs. I sa tracta numnadamain d'ina collecziun da 249 chartas. Ina singula charta custa 13.50 francs.

Svilup rasant


Avant tschintg onns ha l'Uffizi da topografia cumenzà a digitalisar sias chartas. L'emprim han ins fatg quai sulet cun las chartas dad 1:100 000 e dad 1:50 000. Gist da quel temp ha *Felix Blatter*, responsabel da PR, cumenzà a lavurar tar l'uffizi topografic. El sa regorda anc ch'el ha dumandà: «Cura cumenzan ins a digitalisar las chartas dad 1:25 000?» La reacziun è stada ina risada. Pertge las cd's na fissan betg stadas adattadas per tals mantuns da datas.

Ma quai che ha procurà avant tschintg onns per risadas, è uss realitad. La primavaira 2005 è cumparida l'emprima DVD cun las chartas dad 1:25 000 dal chantun Berna. Dacurt han ins gia edì la sisavla DVD cun il Tesin ed il Mesauc. I manca be pli il Grischun.

Pli bun martgà?

Sin la dumonda pertge ch'ins edeschia il Grischun sco ultima regiun, di Blatter: «Insatgi sto esser il davos. Ma nus avain era vuli resguardar l'actualisaziun.» Las chartas geograficas vegnian complettadas e restampadas mintga sis onns. Per resguardar l'actualisaziun sin la DVD saja il Grischun sco davos en roda.

Las chartas digitalas portan il num «Swiss Map 25». Ina DVD custa 178 francs. Fin uss èn vegnidadas edidas suandantas regiuns: Svizra occidentala, Giu-



Tgi che planisescha a moda minuziusa po stampar ora il profil d'autezza da sia tura.

MAD

ra, Berna, Vallais, Svizra centrala, Svizra orientala, Tessin. Mintgina da questas DVD's cuntegna las datas da pli che 40 chartas dad 1:25 000. Sin palpieri custass quai 450 francs.

Avantatgs

Sch'ins planisescha ina tura cun las chartas digitalas pon ins – en cumbinaziun cun internet – profitar da links tar uniuns da traffic. Uschia chattan ins svelti las numeras da telefonar da chamonas ed ils uraris da pendicularas. La charta digitala inditgescha era infurmaziuns en connex cun chastès e bajetgs istorics.

Tgi che planisescha a moda minuziusa po stampar ora il profil d'autezza da sia tura. Ils singuls secturs ch'ins dovra per la tura pon ins sa chapescha stampar. Quai possian ins far cun mintga stampader normal, sinceresch Blatter.

D'avantatg saja dentant ina color impermeabla. La software da la «Swiss Map 25» è per part cumpatibla cun apparats da GPS.

Disavantatgs

Ed uss? Na datti en paucs onns naginas chartas sin palpieri pli? «Segir betg», manegia Blatter. «Ils alpinists experimentads prefereschin vinavant la charta da palpieri.» Il «computer» stampa la charta gea sulet en quatter colors. Las chartas originalas perencunter sajan stampadas en otg colors. Quai porschia ina bler pli gronda precisuon e clerezza.

Il palpieri da las chartas originalas saja strappatschabel e na stargia betg, sch'el vegnia in zitg bletsch. Blatter è perquai persvadi che selviculturs u guardiaselvaschinas che lavuran savens cun chartas geograficas dovran vinavant la chartas da

palpieri. La varianta digitala saja plitost insatge per la planisaziun a chasa.

Per lavurar cun «Swiss Map 25» dovran ins computers cun ina buna capacitat. Uschiglio pudess la planisaziun d'ina tura tut tenor custar dapli temp che la tura sezza.

Finalmain chartas era per «Mac»

Fin uss funcziunavan chartas digitalas adina mo sin windows. «Swiss Map 25» è dentant era fatg per computers d'Apple. L'Uffizi federal da topografia ha fatg lavur da pionier e sviluppà ina software ch'è era adattada per «Mac».